

13 MAY 1996
Osman-Perjumpaan
OSMAN MINTA ANGGOTA UMNO BERTENANG

ALOR SETAR, 13 Mei (Bernama) -- Menteri Besar Kedah Tan Sri Haji Osman Aroff hari ini menasihati anggota Umno di negeri ini supaya bertenang sementara menunggu keputusan Perdana Menteri berhubung surat perletakan jawatannya sebagai Menteri Besar.

"Bertenang ... tunggu keputusan," katanya kepada pemberita semasa diminta nasihatnya kepada anggota Umno yang mungkin keluh-kesah sekarang dalam menunggu keputusan Datuk Seri Dr Mahathir Mohamad.

Perdana Menteri ketika ini sedang melakukan lawatan ke Jepun sebelum ke Amerika Syarikat dan beliau dijadual kembali ke tanah air pada 24 Mei ini.

Dr Mahathir memberitahu pemberita baru-baru ini beliau masih belum buat keputusan sama ada menerima atau menolak surat perletakan jawatan itu.

Osman berkata beliau akan menunggu masa yang sesuai untuk menemui Perdana Menteri bagi membincangkan perkara berkaitan jawatan itu.

"Saya menyerahkan kepada Perdana Menteri ... apabila tiba masa yang sesuai, saya akan berjumpa dengannya," katanya selepas mempengerusikan mesyuarat Perbadanan Kemajuan Negeri Kedah, di sini.

Osman mengesahkan telah menemui Dr Mahathir di Masjid Negara, Kuala Lumpur, minggu lepas difahamkan semasa mereka menghadiri majlis tahlil sempena sambutan ulang tahun ke-50 Umno.

Semasa ditanya pemberita hari ini mengenai perjumpaan itu, beliau berkata: "Saya tidak mahu membuat sebarang kenyataan lagi mengenai perkara ini."

Ketika ditanya sama ada Perdana Menteri ada menyatakan sesuatu kepadanya setakat ini, Osman meminta pemberita supaya menunggu Dr Mahathir membuat keputusannya.

-- BERNAMA

MFJ AHH